

# 2 Timoteo

---

**Pablo ishim Timoteo saludo.**

**1** <sup>1</sup>Yok Pablo. Yok Jesucristo ir apóstol. Porrosht chihla yok par uje tomsaha erze obiyo par tanimirāha ir ahwoso. Chibite lahvoskite uje tyenij ishim ōr ese ikirit uje de ire ahir uje ye olotiis Jesucristo.

<sup>2</sup>Timoteo, tichew ana hutita par tokosim owa. Ich tahmūr pishi owa. Shi owa itso uje pijo. Sehe tuu eyok Deych Porrosht hn eyok Irhīch Jesucristo odosir owa hn onuuna uje owa losuhlaap hn otakashim owa hn oduhu ehēt kiis.

<sup>3</sup>Deeych hn dihlak shish yok orar tapur Porrosht hn peyucha owa. Tikina Porrosht par owa. Tiyokōr Porrosht ibiyo hn peyuwo om shi yok itso uu yok poruwo wishi oshiyokōr Porrosht ibiyoni. <sup>4</sup>Tukuucha uje tikitolihī ahirni hn eyerh. Sehe takachim owapo par uje pehet kiis. <sup>5</sup>Peyucha owa uje owa ye ehēt yuhurāshpe uje ye otiis Cristope. Ekita wap Loida ye lotiis Jesús petikni, hn ata itspo Eunice hn owa itspo ye otiis toy.

<sup>6</sup>Heke titim owa par uje akucha uje tibite pihme eheta eeychni hn tapur Porrosht hn ishim owa akirbo par uje ahakōr erze ir ibiyo. Per ele ahle erze akirbo uje de owa shi itso jwekita ich hūre pikaap. Sehe toy. Tyenij erhū par uje uhu hūrepo <sup>7</sup>pork Porrosht ishim eyok Dechibichni par uje ye yitila oso. Ishim eyok Dechibichni par uje shuu eyok ukurbo de, hn par shuu yahmūr oso hn par takashim eyok par uje ye yiyokōr uje ich mihñūwo. <sup>8</sup>Abey owa par uje ye apook hn ye moym uje animirāha eyok Irhīch Jesucristo ir ahwoso, hn ye apookpe uje oshiyeru yokihī ohyerpta shi pork tanimirāha eyok Irhīch ir ahwoso. Animirāha Porrosht ahwoso hn kimiji kuche mihñūwo tīr owa uje ahakōr uhu itsorz ich yukwiīye pork kuche mihñūwo tīr eyok shi pork yanimirāha Porrosht ahwoso yitim ōr uje Jesús ishi ōr hñitewihī Porrosht ahirkite. Porrosht ukurbo deyo de hn takashim eyok. <sup>9</sup>Wichi shuu Jesús ishi eyok hñitewihī dahir, hn wichi chihla eyok par uje shish yiyokōr uje ire sahmūr. Ye diihla eyokpe pork yiyokōr uje om. Shi chihla eyok pork sehe diihla. Takashim eyok shi pork sehe takashim pork ye yotiispe uje Cristo ishi

eyok hnitewihi Porrosht ahirni. Uje ehn yahpaa niyokōr nāhu ĩrmo petikkite ichii Porrosht sahmūr eyok. <sup>10</sup>Ele ahle Porrosht shuu imeheeych uje sahmūr eyok pork shuu Jesucristo tirētni par uje ishi eyok hnitewihi Porrosht ahir. Jesús ye duhu yarhakpe uje oso otoy uje ye olotiis ire pork shuu imeheeych uje ōr ĩkirīt de uje yelij nihna ire. <sup>11</sup>Porrosht chiihla yok par uje tanimirāha ir ahwoso titim ōr uje Jesús ishi ōr hnitewihi ire ahirkite, hn shuu titīr lekitiyo par uje titim ōr pork yok ir apóstol par tiyokorāha ōr ir ahwoso. <sup>12</sup>Ye onahmūrpe uje tiyokorāha ōr tuu itsorz heke oshiyeru yokihi ohyerpta. Per ye tikipookpe uje yok dechi pork tikiraha uje ye tokotiis Jesucristope, hn pehet kiis uje tokosim ire pikirīt par uje tibey pork tikiraha uje terihi ese deeych uje taācha nehe hn erze uje Jesús tata ich yakaha. <sup>13</sup>Ye ekey erze Porrosht ahwoso uje titim oso. Eēt yok par uje owa pwele animirāha atim oso yewo. Ye otiis Jesucristope hn ahmūr erze oso yewopo. <sup>14</sup>Abeyship erze Porrosht ahwoso uje titim owani par uje animirāha atim oso. Porrosht Ichibich de eyok aho heke wichi takashim owa uje abey erze ir ahwoso.

<sup>15</sup>Eraha uje erze hnakirbo uje otāra wahacha hnimich Asia uje ōya yokni ich nos oym yok nehech Figelo hn Hermójenes oym yok toy. <sup>16</sup>Sehe tuu eyok ĩrhīch dosir ese Onesíforo hn nos wir ir iiso. Wichi shish takashim yok hn shuu tukuurapo. Wichi ye poym yokpe uje kenena de pihmike, <sup>17</sup>per uje tīr Roma ich wichi shish chukwi yokihi wahacha nehech chish yok. <sup>18</sup>Ese deeych uje eyok ĩrhīch cheeshpo nehe hn sehe tuu eyok ĩrhīch dosir ire. Erahapa uje ehn yok de wahacha dīt Efesoni hn wichi shish takashim yok.

### Porrosht aabo tyenij otseēt ohyerptosos.

**2** <sup>1</sup>Timoteo, owa shi owa itso uje pijo. Tyenij eyuhu owa ĩra erze akirbo uje Jesucristo ishīm owa. <sup>2</sup>Tyenij owa eyucha pahwoso uje ĩntni uje titim oso okihniya. Wir ochiraha uje erze ahwoso ich ũru. Owa tyenij ahakorāha erze ahwoso atim hnakirbo uje ye olotiis Porroshtpe par uje wir oshiyokorāha oso yewo toy. <sup>3</sup>Titim owa par uje owa ewenta erze kuche mihñūwo uje tīr owa pork owa Cristo ĩbik. Tyenij uhu owa itso uje ohyerptosht shiyokōr uje ir iluu om. <sup>4</sup>Ese uje masaha par ohyerptosht ye ichii niyokōr obiyope duhu kināho. Shi tyenij shiyokōr uje ir bahlut tatim ire pork sehe duhu ir bahlut ehēt kiisihni ire. <sup>5</sup>Shi itspo ese uje loter pilota. Kimiji ye niyokōr uje refle tatim ire ich ye derzpe. Ye dosim ire asa koptape. <sup>6</sup>Hn shi itso ese uje chish obiyoho ir shakirrrza ehēt. Ich chiyuhu ire heke wichi webich osht uje tyenij hnoy erze ir jōro ee uje chekushu. <sup>7</sup>Tyenij uhu eyuwo tisīr ahñūwo uje titim owaka, hn eyok ĩrhīch nos shuu eraha keshi duhu inaapo ahñūwo pahwoso.

<sup>8</sup>Owa eyucha Jesucristo. Wichi ĩkponi, hn ir porokkite wichi uu rey David lishi. Ahñūwo ir ahwoso uje tanimirāha titim oso uje ishi ōr

hñitewihî Porrosht ahirkite <sup>9</sup>heke wir oshiyeru yok. Oshiyeru kenena pihmiko oshuu yok itso uje tiyokôr uje mîhnik, per ye ôr pwele onontew erze Porrosht ahwospe. Shish ochuntihî lekitiyo, <sup>10</sup>heke yok ewenta erze mihñūwo uje tîr yok par uje erze oso uje Porrosht chihla ôr pwele omasaha par Porrosht aabo toy nehe uje ye olotiis Jesucristope, hn ôr ikirît de uje ich ihîrtpa uje yelij nihna ire.

<sup>11</sup>Titim owa ahñūwo ahwoso uje ich ūru. Cristo tooho eyok. Kimiji ye yotiis irpe ich shî itso uje yukwîya ire hn yuti toy. Hn Cristo ikpo, heke eyok tyenij eyok ikpo hn yebuhu ire ahir nehe. <sup>12</sup>Uje kuche mihñūwo tîr eyok ich tyenij shish eyok ewenta. Kimiji eyok ewenta itsorz hn tyenij eyok ir wimshiro hn yukwîya ire. Uje yiita uje yukwim ire ich ire tyenij iim eyok toy. <sup>13</sup>Kimiji yotiis, per ire shish ye sehi lahwospe pork ire ye pwelpe sata uje ire ye Cristope.

<sup>14</sup>Tyenij shish uhu Porrosht aabo ôr eyucha ahñūwo pahwoso uje titim owaka. Porrosht sehe duhu atim ôr par uje oym oshiyokosyeche erze ôr ahwoso uje ye jukur. Wir shî chimehî oso ôr eyuwo uje otêr. <sup>15</sup>Uhu owa duurapo par ahakôr Porrosht ibiyo ich uhu ihîrts pisho. Heke uje terihî ese deeych uje aachîhî Porrosht ile ikich nehe ich sahmûr pork uje animirâha Porrosht ahwoso ich ye eymehîpe. Ye ompe uje ahakôr uhu kinaha, heke ich uhurc ich apook. <sup>16</sup>Aham erze uje otakîsho lawich hn shî otata lahwoso mihñūwo. Erze uje ye onaham ôr shî ôya ôr heke oshuu ôr iluu mihñū nehech ôr iluu mihñūpa itso ôr. <sup>17</sup>Erze ôr ahwoso uje oshiyokorâha ôr wir ahwoso mihñūwo uje chûr lekitiyo shî itso permo oshye. Wir erze uje tîr Himeneo hn Fileto <sup>18</sup>hn shuu ôr eyuwo mihñūwo heke oym erze Porrosht ahwoso uje ich ūru. Otata uje topo ôr ikponi hn oshuu erze Porrosht aabo nohmîramo otsotiis Porrosht. <sup>19</sup>Per Porrosht chîbite lahwoso ich tyenij yakaha. Ir ahwoso uje shuu eyok aho kiis tata im: —Eyok Irhîch chîraha laabo.— Hn tata toy im: —Nos wir erze uje otata otsii: “Cristo wichî uu ôryok Irhîch,” wir uje tyenij oym erze mihñūwo uje oshiyokôr.—

<sup>20</sup>Titeêta kuchît titim owa. Pwert dich eheth kuche de uje oro, hn kuche de uje plata, hn kuche de uje tabla, hn kuche de uje katuu. Erze uje ich ihîrtso wir oro hn plata. Okahnîr par ôr ahmiyo. Erze uje ich tabla hn katuu wir uje ochîra obiyo kal deeych. <sup>21</sup>Uje yeêk iim shiyokôr uje mihñūwo par uje ire itso erze oro hn plata ich chimît ire par uje shiyokôr Porrosht ibiyo. Wichî shuu deluuta om. Heke ir yînsirc sahmûr pork chimît ire par nos shiyokôr wir obiyo uje ich ihîrtso. <sup>22</sup>Aham erze mihñūwo uje hñakîrbite hn apîbite shish oshiyokôr. Shish emît owa par uje ahakôr uje ich om, hn emît owa par uje ma ye otiis eyok Irhîch ir ahwoso, hn ahmûr oso yewo, hn uhu eheth kiis. Tyenij meya erze Porrosht aabo yewo uje ôr iluu om hn shish ôr orar otsapur eyok Irhîch. <sup>23</sup>Aham erze uje oshiyokosyeche erze kuche uje ye jukur pork eraha uje wir

shi oshuu oso ochinkērk delo. <sup>24</sup>Ich ye ompe uje eyok ĩrhīch ir ibich satsirāha lahwoso. Shi tyenij nos keytkēr oso hn hnetā lahwoso. Tyenij chiraha shiyokorāha oso Porrosht ahwoso, hn tyenij shish hnetā oso. <sup>25</sup>Erze uje ye onahmūr eyok ĩrhīch ir ibich ir ahwoso ich tyenij saraāshi uje shiyokorāha ōr, hn shi iyem uje Porrosht shuu ōr eyuwo tisīr nehech ochiraha uje erze ahwoso ich ūru. <sup>26</sup>Ich uhurc hn ochiraha uje ich ūru, hn ochiraha uje Satanās sehnyēr ōr. Wir shi ōr itso uje otokolihī Satanās trampta ehēt. Uje ehn wir ode asa trampta ehēt ich oshiyokōr uje Satanās sahmūr.

**Uje yej terihī ĩrmo uhurc nehe ich oso oshiyokōr mīhnūwo.**

**3** <sup>1</sup>Sehe tuu erahapa uje ich yej terihī uje ĩrmo sīhna ire hn ich yarhakpa par oso. <sup>2</sup>Oso ode ich okihniya nehe uje shi otsahmūr ire. Ode uje opota hnote hn ode uje ich onarim pishi ire. Ode uje otata uje ma ochiraha kuche je yewo hn ode uje ochinehnm̄ Porrosht hn ochinehnm̄ nos wir oso toy. Ode uje ye otola deyo hn datipe hn ode uje yelij onina uje oshim̄ ōr kuche. Ode uje ye otola Porroshtpe. <sup>3</sup>Ode uje ye onahmūr nerētpe hn daabo hn timcher ōr itspo, ye onahmūr dabiyope hn ye onahmūr daabope. Ode uje yelij ōr perdonar oso yewo. Ode uje otatim̄ dekushī oso par uje oshuu oso otsitak yewo. Ode uje ye ōr pwelpe uje otibey ire heke shish oshiyokōr uje mīhnūwo. Ode uje ōr ehñito. Ode uje ye onahmūrpe uje ich om. <sup>4</sup>Ode uje otatim̄ oso ōr imāho par uje oshuu ochishew ōr, hn ode uje oshiyokōr kuche shīchish hn yelij ōr pyensa kimiji om o kimiji mīhnik. Ode uje sehe oduhu deyuwo ma deyo je erze yewo, hn ode uje ma otsahmūr uje olota je uje oteeychāha Porrosht. <sup>5</sup>Wir oshuu oso oteychim̄ ire par uje oshuu ōr pyensa uje wir Porrosht aabo per ye oduhu Porrosht ĩchibich nuhrū dahope. Aham erze oso uje oshiyokōr oshuu itsorz. <sup>6</sup>Hnakirbo ode erze oso ōr ehēt uje otīr erze timcher ōr ihyuwo hn otsehnyēr ōr. Erze timcher ye oduhu deyuwo tisīrpe. Wir shish oshiyokōr uje mīhnik. Shish otēr erze uje otsehnyēr ōr. <sup>7</sup>Shish oso oshiyokorāha erze timcher per yelij odiraha uje ich ūru. <sup>8</sup>Erze hnakirbo uje otsehnyēr erze timcher wir shi ōr itso ese Janes hn Jambres uje sehe onontew Moiseskite. Sehe onontew erze ahwoso uje ich ūru. Shi oshuu deyuwo tisīr erze kuche uje ich mīhnūwo. Otata uje ōr Porrosht aabo per otsotiis Jesús. <sup>9</sup>Shi oshiyokorāha oso pikaap hn nos oso okemihī ōr shi itso erze uje ōr osiyer sehe onontew Moiseskite.

<sup>10</sup>Owa ye owa ilo ōrpe. Eraha erze ahwoso uje tiyokorāha oso, hn eraha yok piluu, hn eraha erze uje sehe tiyokōr. Eraha uje ye tokotiis Jesuspe, hn erahapo uje tikinta pishi oso. Eraha uje tahmūr oso, hn nos eraha uje yok ewenta wir kuche mīhnūwo uje tīr yok. <sup>11</sup>Eraha erze kuche mīhnūwo uje oshiyokorāhi yok, hn eraha erze yok dosīryo uje chish yokihī dehet paho. Eraha toy nos wir erze mīhnūwo uje masaha yokihī wahacha dīt

Antioquía hn Iconio hn wahacha dít Listra. Eraha erze mihnũwo uje yok ewenta uje oso oshiyokorĩhi yok, per eyok İrhĩch takashim yok heke ye wir oduhu yokpe oduhu tikiti. <sup>12</sup>Ich ũru uje nos wir erze uje sehe oniyokõr uje Jesucristo sahmũr ich shish oso oshiyokõr mĩhnuwõho õr. <sup>13</sup>Per erze hnakirbo uje õr iluu mĩhnũ hn erze yewo uje otsehnỹer oso shish oshiyokõr uje ma mihnũwo hn shish ma otsehnỹer oso hn yewo odepo uje otsehnỹer wir. <sup>14</sup>Per owa ye owa ilo õr heke shish ahakõr erze uje oshiyokorãha owani pork eraha uje ich ũru hn eraha erze uje oshiyokorãha owa. <sup>15</sup>Uje ehn owa pikihnaapni ichii eraha nehech ele ahle yesh eraha erze Porrosht ahwoso. Porrosht ahwoso shuu eraha uje ye otiis eyok İrhĩch Jesucristope hn shuu amsaha par owa Porrosht aap. <sup>16</sup>Nos wir Porrosht ahwoso tãra ire pork shuu oso ochichew lawhoso. Porrosht ahwoso ich om par uje oshiyokorãha õr, hn sahmũr õr uje oshiyokõr uje mĩhnik. Ich om par nishii erze uje ochimehi kuche, hn ich om par oshiyokorãha õr oshuu oshiyokõr uje Porrosht sahmũr. <sup>17</sup>Uje õr ler Porrosht ahwoso hn uje otẽr ich nishii õr eyuwo erze uje otsahmũr ire par oshiyokõr nos wir obiyo uje ich ihĩrtso.

**4** <sup>1</sup>Porrosht hn Jesucristo sehe oduhu titim owa uje nos wir erze uje yesh õr ika hn erze uje otoni tyenij otãr Jesús ile ikich nehe. Wichĩ jwe uje tyenij teychĩm erze mihnũwo uje oshiyokõrni. Titim owa pork Cristo tyenij cheeshpo nehe hn masaha par rey. Sehe tuu <sup>2</sup>shish animirãha Porrosht ahwoso. Emit owa par uje animirãha Porrosht ahwoso uje owa tyempit de, hn uje ye owa tyemptikish. Enshii erze uje ochimehi kuche, hn ahĩrm erze uje oshiyokõr uje mihnũwo par uje oshiyokõr uje ich om. Uhu oduurapo par uje oshiyokõr uje ich om. Tyenij eentha pishi õr uje ahakorãha õr <sup>3</sup>pork uje terihĩ ishĩrit nehe ich ye oso onahmũrpe uje otẽr erze ahwoso uje ich ũru. Erze oso tyenij ochiihla hnakirbo ich okihniya par uje oshuu oshiyokorãha õr ahwoso uje otsahmũr otẽr. <sup>4</sup>Porrosht ahwoso ich ũru per ye onahmũrpe par uje otẽr. Shi otsahmũr otẽr erze monihne. <sup>5</sup>Per owa shish tyenij abeyshĩp owa. Tyenij owa ewenta erze kuche mihnũwo uje tĩr owa, hn tyenij shish ahakorãha oso par uje uhu omasaha par Porrosht aabo. Nos ahakõr erze obiyo uje Porrosht ishĩm owa. <sup>6</sup>Yok shi yok itso erze kuche uje oshĩm Porrosht par uje oteychãha ire, pork yej terihĩ ese pishĩrit uje par oshuu yok. <sup>7</sup>Ich timitike erze obiyo uje Porrosht ishĩm yok par uje tiyokõr heke shi itso uje oteye hn terz. Shi yok itspo ese uje uushi hn serz. Yelij tokotiis Jesucristo <sup>8</sup>heke yok premit yesh dechi poõrc. Wichĩ yok premit uje yok İrhĩch tyenij shuu piluuta ompa. Yok İrhĩch ich jwe uje yelij niyokõr uje mĩhnik. Uje terihĩ ese deeych nehe ich ishĩm yok uje terz, hn ye duhu yok sohmĩrape. Nos ishĩm wir toy uje otsahmũr uje ire tirẽt.

**Pablo tatim Timoteo chihi iraãpo erze ir ihỹere.**

<sup>9</sup>Sehe tuu erẽt shĩchish etĩr yok. <sup>10</sup>Demas ich sahmũr pishi ĩrmo ishujãro heke iim yokni. Hno tĩr wahacha dít Tesalónica. Shi Crescente

hno tĩr wahacha hnimich Galacia, hn Tito hno tĩr wahacha hnimich Dalmacia. <sup>11</sup>Shi Lucas nohmira sakaha pahir. Timoteo, sehe tuu bo bey Marcos par tĩrēt nōya owa tĩr yok pork wichi shish takashim yok pibiyo. <sup>12</sup>Tuu Tĩquico hno tĩr dit Efesoni. <sup>13</sup>Timoteo, uje erēt nehe hn ōhwa asa piyērp̄ta waa je tĩra hmemit uje tokoymĩhi wahacha dit Troasni. De ese hnakĩrbich ihyuch uje iich otsi Carpo. Ōhwa yok hute toy, hn ye moym erze hute uje oshiyokōr ochĩra obeji yũhir. <sup>14</sup>Alejandro ir ibiyo ich shi shiyokōr fyero, wichi shiyokōr kuche mĩhnuwōho yokni ich kihniya. Eyok ĩrhĩch tyenij shuu ishi dabahat erze mĩhnũwo uje shiyokorĩhi yokni. <sup>15</sup>Abeyship owa par uje ye wichi niyokōr mĩhnikĩhi owa toy pork wichi sitakpa erze Porrosht ahwoso uje yiyokorāha ōr. <sup>16</sup>Uje otseya yok jwe ikich wapni ich nĩhyok ye latik takashim yok. Nos oym yok. Sehe tuu Porrosht ye nowāha ōrpe hn ye depyē ōr. <sup>17</sup>Eyok ĩrhĩch takashim yok hn ishĩm yok pukurbo par uje yok pwele nos tanimirāha Porrosht ahwoso hn tuu nos dihipo ochiraha. Eyok ĩrhĩch takashim yok heke ye oduhu yok oduhu tikiti shi itso uje chiyuhu yokĩhi ĩlpiyot ahwo. <sup>18</sup>Eyok ĩrhĩch tyenij takashim yok par uje yok ewenta erze mĩhnũwo uje oso oshiyokorĩhi yok par uje takaachĩhi wahacha ir ahĩr poōrc nehe. Sehe tuu Porrosht dich. Tahmũr uje itsorz.

**Pablo ishĩm saludo nahĩre.**

<sup>19</sup>Tokosĩm saludo Prisca hn Aquila hn nos wir Onesĩforo ir iiso. <sup>20</sup>Erasto sakaha ese dit Corinto, hn tokoymĩhi Tróximo wahacha dit Mileto pork wichi permoni. <sup>21</sup>Timoteo, emit owa hn erēt shichish etĩr yok pork yej terihi hmamo ishĩrĩt. Eubulo ishĩm owa saludo. Pudente hn Lino hn Claudia oshĩm owa saludo toy, hn nos wir Porrosht aabo uje ode lika. <sup>22</sup>Sehe tuu eyok ĩrhĩch Jesucristo shish nōya owa, hn sehe tuu Porrosht shish nos dosĩr olak.